

## ZAKON O OGRANIČENOJ UPOTREBI DUHANSKIH PRERAĐEVINA

### I OSNOVNE ODREDBE

#### Član 1.

Ovim zakonom uređuje se ograničena upotreba duhanskih prerađevina, obaveze proizvođača, zabrana reklamiranja i prodaje duhanskih prerađevina i druga pitanja u cilju zaštite i unapređenja zdravlja građana od štetnog djelovanja duhanskih prerađevina.

#### Član 2.

Duhanskim prerađevinama, u smislu ovog zakona, smatraju se: 1. cigarete, 2. cigare, 3. cigarilosi, 4. duhan za lulu i duhan za pušenje, 5. duhan za šmrkanje i žvakanje, i 6. druge duhanske prerađevine.

### II ZABRANA UPOTREBE DUHANSKIH PRERAĐEVINA

#### Član 3.

Upotreba duhanskih prerađevina (u daljem tekstu: pušenje) zabranjuje se u: 1. odgojnoobrazovnim ustanovama, 2. ustanovama za smještaj i boravak djece i studenata, 3. zdravstvenim ustanovama, 4. socijalnim ustanovama, 5. drugim javnim ustanovama. Zabrana pušenja iz stava 1., ovog člana odnosi se na sve federalne, kantonalne, gradske i općinske organe i institucije. Zabrana pušenja iz stava 1. ovog člana odnosi se i na preduzeća i druga pravna lica gdje se obavlja proizvodni proces. Zabrana pušenja odnosi se i na radne prostorije preduzeća i drugog pravnog lica u kojima se odvija rad sa strankama, odnosno u kojima rade dva ili više radnika od kojih je najmanje jedan nepušač. U ustanovama, preduzećima i drugim pravnim licima iz st. 1, 2. i 3. ovog člana pušenje je dozvoljeno u posebno određenim prostorijama za pušenje.

#### Član 4.

Zabrana pušenja odnosi se i na zatvorene objekte u kojima se: 1. održavaju kulturne, zabavne, sportske i druge manifestacije, priredbe i takmičenja, 2. vrši snimanje i emitiranje, 3. održavaju sjednice i drugi organizirani skupovi građana, osim u za to određenim prostorijama u smislu člana 3. stava 2. ovog zakona.

#### Član 5.

U ugostiteljskim objektima gdje se vrši usluživanje hrane utvrđuju se posebne prostorije za pušenje. Pušenje je zabranjeno u slastičarnicama i mliječnim restoranima.

#### Član 6.

Pušenje se zabranjuje i u: 1. sredstvima u kojima se vrši javni prijevoz u cestovnom saobraćaju (uključujući i sredstva gradskog saobraćaja); 2. sredstvima u kojima se vrši javni prijevoz u željezničkom i zračnom saobraćaju i unutrašnjoj plovidbi osim u posebno određenim prostorijama za pušenje; 3. žičarama; 4. liftovima. Pušenje se zabranjuje i u stanicnim objektima, osim u posebno određenim prostorijama za pušenje.

### III OBAVEZE PROIZVOĐAČA

#### Član 7.

Zabranjena je proizvodnja i prodaja duhanskih prerađevina koje na ambalaži nemaju na vidnom mjestu istaknut podatak o tome koliko miligrama katrana i nikotina sadrže. Podatak iz stava 1. ovog člana mora biti odštampan u boji koja se razlikuje od podloge, slovima koja su velika najmanje 2 mm.

### **Član 8.**

Proizvođači i uvoznici duhanskih prerađevina dužni su da na originalnom pakovanju, na prednjoj strani proizvoda, stave oznaku upozorenje: "PUŠENJE JE ŠTETNO ZA ZDRAVLJE". Pored oznake upozorenja iz stava 1. ovog člana, duhanske prerađevine u prodaji moraju, na bočnoj strani originalne ambalaže, imati odštampano i jedno od slijedećih upozorenja: "pušenje skraćuje život", "pušenje prouzrokuje rak pluća i bolesti srca", "pušenje u trudnoći škodi razvoju djeteta". Oznaka upozorenje iz st. 1. i 2. ovog člana mora biti odštampano u boji koja se razlikuje od podloge i ne smije biti na dijelu ambalaze koja se otvara, kao ni na dijelu koji se pri otvaranju uništi.

## **IV ZABRANA REKLAMIRANJA**

### **Član 9.**

Zabranjeno je reklamiranje duhanskih prerađevina u štampi, na radiju i televiziji, putem bioskopskih dijapozitiva, filmova, panoa, tabli, naljepnica i drugih oblika reklame na javnim mjestima, na objektima i sredstvima prijevoza (saobraćaja) putem svjetlećih reklama, knjiga, časopisa, kalendara i odjevnih predmeta, uključujući i sponzoriranje sportskih, kulturnih i drugih javnih priredbi od strane preduzeća koja se bave proizvodnjom i prodajom duhanskih prerađevina.

### **Član 10.**

Ne smatra se reklamiranjem iz predhodnog člana objavljivanje obavijesti o kvalitetu u drugim svojstvima duhanskih prerađevina u stručnim knjigama, časopisima i drugim publikacijama koje su namijenjene isključivo proizvođačima ili prodavcima duhanskih proizvoda. Reklamiranjem se ne smatra ni isticanje firme proizvođača.

### **Član 11.**

Proizvođači i prodavači na veliko mogu obavijestiti građane, u trajanju najduže 15 dana, o pojavi na tržištu nove vrste duhanske prerađevine. Novom vrstom duhanske prerađevine, u smislu stava 1. ovog člana, smatraju se duhanske prerađevine koje imaju smanjenu količinu katrana za 10 ili više postotaka od istovrsnih duhanskih prerađevina koje su u prodaji, a koje imaju najnižu količinu katrana i nikotina. Informacije iz stava 1. ovog člana ne mogu se objavljivati na radiju ili televiziji kao ni u publikacijama namijenjenim pretežno mladim.

## **V ZABRANA PRODAJE**

### **Član 12.**

Zabranjuje se prodaja duhanskih prerađevina u objektima koji su od predškolskih i školskih ustanova udaljeni manje od 100 m i koji su smješteni unutar sportsko-rekreativnih površina. Zabranjuje se prodaja duhanskih prerađevina: osobama mlađim od 15 godina, iz automatskih aparata, koje nisu u originalnom pakovanju proizvođača, koje se prodaju u rasutom (rifuznom) stanju i koje ne sadrže oznaku upozorenje iz čl. 7. i 8. ovog zakona.

## **VI NADZOR**

### **Član 13.**

Nadzor nad primjenom ovog zakona obavlja: 1. Sanitarna inspekcija nad primjenom odredaba člana 3. stav 1., člana 4. tač. 1. i 2. i čl. 5. i 6.; 2. Inspekcija rada nad primjenom odredaba člana 3. st. 2. i 3. i člana 4. tačka 3.; 3. Tržišna inspekcija nad primjenom odredaba čl. 7, 8, 9, 11. i 12. ovog zakona. Nadzor nad primjenom čl. 7. i 8. ovog zakona pri uvozu duhanskih prerađevina obavlja Federalno ministarstvo finansija i Carinska uprava. Ako nadležni inspeksijski organi iz stava 1. tačke 3. ovog člana utvrdi da se duhanske prerađevine prodaju, odnosno reklamiraju protivno odredbi čl. 7, 8, 9, 11. i 12. ovog zakona, donijet će rješenje o zabrani prodaje, odnosno

reklamiranja. Žalba protiv rješenja iz stava 3. ovog člana ne odlaže izvršenje rješenja. Troškove izvršenja snosi izvršenik.

## VII KAZNE NE ODREDBE

### Član 14.

Novčanom kaznom od 1.000 do 5.000 KM kaznit će se za privredni prijestup preduzeće ili drugo pravno lice koje se bavi proizvodnjom, uvozom i prometom duhanskih prerađevina, ako: 1. suprotno zakonu, na originalnom pakovanju duhanskih prerađevina ne istakne podatak iz člana 7. i upozorenje iz člana 8. ovog zakona, odnosno ako prodaje duhanske prerađevine suprotno članu 12. stavu 2. ovog zakona; 2. suprotno odredbi čl. 9, 10. i 11. ovog zakona vrši reklamiranje duhanskih prerađevina. Za privredni prijestup iz stava 1. ovog člana kaznit će se novčanom kaznom od 250 do 500 KM i odgovorno lice u pravnom licu.

### Član 15.

Novčanom kaznom od 500 do 2.000 KM kaznit će se za prekršaj ustanova, preduzeće i drugo pravno lice, odnosno fizičko lice, ako ne zabrani pušenje i ne odredi prostorije za pušenje u roku iz člana 19. ovog zakona. Za prekršaj iz stava 1. ovog člana kaznit će se novčanom kaznom od 100 do 150 KM i odgovorno lice u pravnom licu.

### Član 16.

Novčanom kaznom od 500 do 1.000 KM kaznit će se za prekršaj preduzeće, drugo pravno, odnosno fizičko lice ako prodaje duhanske prerađevine suprotno odredbi člana 12. stav 1. ovog zakona. Za prekršaj iz stava 1. ovog člana kaznit će se novčanom kaznom od 100 do 150 KM i odgovorno lice u pravnom licu.

### Član 17.

Novčanom kaznom od 30 KM kaznit će se na licu mjesta fizičko lice koje puši u: 1. ustanovama, preduzećima i drugim pravnim licima iz člana 3. ovog zakona; 2. objektima iz člana 4. ovog zakona; 3. ugostiteljskim objektima iz člana 5. ovog zakona; 4. sredstvima prijevoza i stanicnim objektima iz člana 6. ovog zakona. Novčanu kaznu iz stava 1. ovog člana naplaćuje inspektor koji vrši neposredni nadzor u skladu sa članom 13. ovog zakona.

### Član 18.

Novčane kazne utvrđene ovim zakonom, do puštanja u opticaj KM, mogu se plaćati u DEM ili u protuvrijednosti valuta koje se koriste u platnom prometu na teritoriji Federacije Bosne i Hercegovine po srednjem tečaju koji utvrđuje i objavljuje nadležna finansijska institucija na dan plaćanja.

## VIII PRIJELAZNE I ZAVRŠNE ODREDBE

### Član 19.

Ustanove, preduzeća i druga pravna lica dužna su istaći znak zabrane pušenja i odrediti prostorije za pušenje u objektima iz čl. 3, 4, 5. i 6. stav 2. i sredstvima prijevoza iz člana 6. stav 1. ovog zakona u roku od 30 dana od dana stupanja na snagu ovoga zakona. Obaveza iz stava 1. ovog člana odnosi se i na fizičko lice koje obavlja djelatnost ličnim radom u objektima iz člana 5. ovog zakona.

### Član 20.

Proizvođači i uvoznik duhanskih prerađevina dužni su na originalnom pakovanju duhanskih prerađevina istaknuti podatak iz člana 7. i upozorenje iz člana 8. ovog zakona u roku od 3 mjeseca od dana stupanja na snagu ovog zakona.

**Član 21.**

Danom stupanja na snagu ovog zakona prestaje na teritoriji Federacije Bosne i Hercegovine primjena odredbe člana 33. Zakona o zaštiti na radu ("Službeni list SRBiH", broj 22/90), kao i odredbe čl. 17. i 18. Zakona o zdravstvenoj ispravnosti životnih namirnica i predmeta opće upotrebe ("Službeni list R BiH", broj 2/92) u dijelu koji se odnosi na zabranu reklamiranja duhana i duhanskih prerađevina.

**Član 22.**

Ovaj zakon stupa na snagu osmog dana od dana objavljivanja u "Službenim novinama Federacije BiH".

Predsjedavajući  
Doma naroda  
**Mariofil Ljubić, s. r.**

Predsjedavajući  
Predstavničkog doma  
**Enver Kreso, s. r.**